

Barúwa ya Yúuda Mulongooryo

Barúwa iyi, yaandikwa ni Yúuda mwaanaavo na Yaakúupu (1:1). Na vamanyi vaséaa yaandikwa kati ya myaaka ya 65-70 keende Kirisitu ^avyaalwa. Yúuda na Yaakúupu ni vaanaavo na Yéesu vajáa (Matáayo 13:55; Maárikí 6:3). Yúuda aandika masáare aya kwa vaantu voosi ^vamura Yéesu.

Yúuda oonekya kintu ^asaakáa aandike lwa ncholo ni ulamuriri (1:3). Maa kaa, avarindula muryungu waachwe akaandika masáare yo vadalavya vaantu ^variingiriráa kwa vaantu ^vamura Yéesu, de vandoovalongowera masáare ya nduwo ya Mulungu. Yúuda avawyira vaantu ^vamura Yéesu valaange neeja kari vakumuririwe tuku ni avo vakiindya va ulongo (1:17-21). Vakiindya avo vavakiindyaa vavalandule nduwo ya Mulungu sa ivarumire vatuube kiikala ja kúri (1:4). Kei vamusiitáa Yéesu ja Mweenevyoosi na baa vahintikira mirimu ya kurumwii (1:8-10). Barúwa iyi yavawyira vaantu ^vamura Yéesu vakasane kukwaatya kumwiilaangya kwaavo Yéesu na vatuube tamanya na mbere (1:20-21).

Lumbi

¹ Nini Yúuda mutumami wa Yéesu Kirisitu, ndiri mwaanaavo na Yaakúupu. Ni kvaandikira niise

nyuunyu ^mwaanirirwa ni Muluungu Taáta. Yeeye Muluungu aveenda na avaálamiraa sa Yéesu Kirisitu.

² Riiso ra wuuja, mwiikalo muja na kwiiyenda ^kuri foo kwe na nyuunyu.

Ulamu wa Vakiindya va Uloongo

³ Vanaviitu naveenda. Nijaa natite mpiima yo vaandikira masáare ya ulamuriri voosi ^tatiite. Maa kaa, niíne nasaakwa nivaandikire na nivaloombe munumunu, mukwaate neeja kura kuruma ^kweene vaantu vaaja vakwaatiwa kamudu kwa mpiindi joosi.

⁴ Ni vaandikira niise aya sa kwatite vaantu ^viifenyekererya kimbiso kuri nyuunyu, vaantu ava keende aho kali, vaandikirwa kuheewa irya iri. Ava ni vara si ^vatúubaa kira Muluungu wiitu ^asákaa, na kei, vaválandulaa masáare ya nduwo yaachwe sa yavarumire vayeende ja kúri. Kei, vamuhéeraa moongo Yéesu Kirisitu, yeeye ^ari Mweenevyoosi na Mweenevyo wiitu yeemweene.

⁵ Haaha noosaaka nivakumbusikye baa neembe mumányire aya masáare, Mweenevyoosi ajaa avalamurirya ta Viisiraéli fuma Mísiri, maa de akavamala vara si ^vamura.☆

⁶ Kei kumbukiri ira mirimu ^myeene si yimirira nkalo jaavo ja wiimiriri. Ikareka nkalo jaavo ja mwiikalo waavo wa ufumo. Muluungu iichuunga minyololwii kwa siku ^jisiina uhero, kuuntu ^kuri na kilwiirya kunu yoowoojera ulamu wa siku ira nkulu.

☆ 1:5 Laanga Uvalo 14:26-35; 26:64-65.

7 Baa kei Sodóoma na Gomóora na míiji ^ijáa mukaaya vavyeendáa uhangutii, na ja kúri vatuubáa uláku wa maviri ^wiisimire na wuumbo waavo. Valamurirwa valairwe chiir_u mootwii kwa siku ^jisiina uhero, sa vave ni ukiindya kwa vaantu viingi.☆

8 Viivyo baa ava vaantu vamukáanaa Yéesu. Njori jaavo javabwéeyya vabweeeye miviri yaavo ive na njeo, vakáanaa wiimiriri wa Muluungu na vahántikiraa viúumbe ^viri na nkongojima vya kumwii.

9 Maa kaa, baa Mikaéli, mukúulu wa mirimu miija, mpiindi ^iidalavyáa na ^iirutáa ndihi na Ikúulu ra Mirimu Mivi sa maviri wa Músa, si ayera kuriheera irya Ikúulu ra Mirimu Mivi na kituki tuku. Yeeye asea, “Mweenevyoosi mweenevyo akwaamirirye!”

10 Vaantu ava, vahántikiraa masáare si ^vayamányire na yara masáare ^vamányire vabwéeyya ja maka ja isaka jira ^jitáangaa kwa wuumbo, kei jisiina miryungu. Na aya masáare noo yoovabweeeya viisaambule.

11 Ni mpolai yaavo! Voovo vootuuba njira ya Kaíni,☆ na sa kisapu vatúubire ukwaata wa Baláamu☆ na vasírire imalo kwa usaambu wa Kóora.☆

12 Ava vaantu ni ja mabandawu miiru ingwii njeru kati ^voorya na nyuunyu chákurya cho rya hamwi ko kwiiyenda, varíjaa baa soni tuku na ni viiríshaa vooveene vii. Kei voovo ni ja machu ^yasiina mbula vari, machu yara ^yafwírikiwaa

☆ 1:7 Laanga Ncholo 19:1-26. ☆ 1:11 Laanga Ncholo 4:1-16.

☆ 1:11 Laanga Uvalo 22-24; 31:16. ☆ 1:11 Laanga Uvalo 16:1-35.

ni mpeho. Na kei ni ja miti ^yaláhiire matúútu ira si ^itúungaa vari, miti ira ^yúuma ng'ang'ala, ikakúulwa.

¹³ Vaantu ava viifwíne na mapúunta ^yahúumba ya mayiyii yara ^yafóokaa na viintu ^vabwéeyaa vyaréetaa soni ja ifulo ^riri foo. Voovo ni ja nyényeeri ^joorimirira kilwiiryii ^cheene javikirwa kwa siku ^jisiina uhero.

¹⁴ Enóoki muuntu wa mufungati fuma kwa Adáamu, ☆ájáa alaala na mutwe kwa vaantu ava yoosea, “Laanga, Ijva yookúja na mirimu yaachwe miija ^iri mayana na mayana.

¹⁵ Yeeye yookúja noo lúusa irya kwa vaantu voosi, no valaira chiiru voosi ^vatúubaa mwiikalo si ^utúubaa kira Múlungu ^asáakaa, kwa nteendo jaavo. Kei yoolúusa kúvalaira chiiru vavi vara si ^vatúubaa kira Múlungu ^yoosaaka, sa masáare yaavo mavi ^meene yakálaryaa ^valúusa kúri Ijva.”

¹⁶ Ava vaantu vang'úulaa na viiririraa. Mwiikalo waavo ni wo tuuba uláku waavo. Milomo yaavo yalúusaa viintu vyo kiivaa vipeembe kwa vaantu sa masáare yaavo mavi yawoloke.

Kuyimiriya

¹⁷ Maa kaa, yakumbukiri masáare ^yalúuswa ni vatumwi va Yéesu Kirisitu Mweenevyoosi wiitu. Vanaviitu naveenda.

¹⁸ Vajáa vavasea, “Siku jo kiimikiriya, fumira vari vaantu ^veene vandomusekerera Mweenevyoosi, vaantu ^vatúubaa uláku waavo kwa mwiikalo si ^utúubaa kira Múlungu ^asáakaa.” ☆

☆ **1:14** Laanga Ncholo 5:21-24. ☆ **1:18** Laanga 2 Peéteri 3:3.

19 Avo vaantũ noo ^voovagavagava nyuunyu, avo ^vatúubaa uláku wa wũambo wa weerũ, vasiina Mũtima wa Mũlũungũ tukũ.

20 Maa kaa, nyuunyu ijeengi kũri kuruma kwaanyu kũja. Nyuunyu naveenda. Luusiki na Ijũva kwa ngururu ja Mũtima Mũja.

21 Kwa njira ijo, imi neeja kũri kweenda kwa Mũlũungũ, kũnũ moowoojera kũja kwa Mweenevyoosi wiitũ, Yéesu Kirisitũ, yeeye kwa riiso ra wũja waachwe ^vatwaala ari na kũri nkaasũ ya sikũ ^jisiina uhero.

22 Mũndoovalaanga na riiso ra wũja vara ^vari na kivundu.

23 Valamuriryi vĩngĩ fuma mootwii, na vĩngĩ valaangi na riiso ra wũja ko laanga neeja kũnũ moojisũla baa ingo jaavo ^jiri na mabandawũ fuma uláku wa miviri yaavo.

Ntálarya

24 Mũlũungũ noo adáhaa kũvĩmirira mũdiire kuwya, na avaréetaa nyuunyu mbere ya nkongojima yaachwe baa si mũng'ũurirwaa tukũ.

25 Kũri yeeye ^ari yeemweene vii Mũlũungũ Mũlamuriri wiitũ, ive nkongojima, ukúúlũ, ngururu na lĩviro lo kũmirira kwa njira ya Yéesu Kirisitũ Mweenevyoosi wiitũ, keende aho kali, haaha na sikũ ^jookũja ^jisiina uhero! Kĩkomi!

Rangi **Rangi Translation Project (New Testament)**

copyright © 2023 Wycliffe Bible Translators, Inc.

Language: Rangi

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-08

PDF generated using Haiola and XeLaTeX on 7 May 2025 from source files dated 8 May 2025

f1dc5da6-bc39-5ea5-ac13-942132b5feb6